

Факирий (тахаллуси; асл исм-шарифи Абдураззок Абдужаббор ўгли) (1880 — Хива якинидаги Бўзхона кишлоғи — 1925) — шоир, хаттот ва наққош. Хивадаги Оллоқулихон мадрасасида ўқиган. Шарқ мумтоз адабиётини ўрганиб, ўзи ҳам шеърлар ёза бошлаган. Отасидан ёғоч ва тангага нақш ўйиш санъатини ўрганган. Машхур хаттот Худойберган Девоннинг шогирди бўлган.

Факирий 1914—15 йилларда ўз шеърларини тўплаб, «Девони Факирий Хоразмий» ни яратган. «Девон» газал, маснавий, мураббаъ, мухаммас, мусаддас, мустазод, рубоий, чистой каби жанрларда ёзилган шеърлардан иборат. Уларда севги ва садокат, халқпарварлик, ватанга мухаббат, маърифат, адолат, халқлар дўстлиги, шахс эрки гоялари улугланган. «Дафтари ашъор ул-жадида» («Янги шеърлар дафтари»)да эса Факирийнинг 1916—24 йилларда ёзган шеърлари мавжуд. «Айрилгали», «Ўзингсан», «Бўлмагай», «Ўзгача», «Аё дилбар», «Кўргач», «Суратинг» радифли газалларида самимий мухаббат, ошиқ изтироблари махорат билан тасвирланган. Шеърларининг кўпи реал, ҳаётий таассуротлар асосида ёзилган.

Сўнгги йилларда ёзилган бир туркум шеърлари «Югурумия» тупламига киритилган (1923). «Девон»нинг шоир кўли билан кўчирилган нусхаси Ўзбекистон Фанлар академияси Шарқшунослик институтида сақланади (инв. №7679).

ШОИР ЎЗ АХВОЛИ ХАКИДА

(Маснавий)

Кичикликдин тушиб бошимга кулфат,
Замоне бўлмадим беранжу мехнат.

Ишим мискинлик ичра бўлди мушкил,
Муродим бўлмади ҳеч ишда ҳосил.

Кўнгулда кун-бакун ҳар турли кайгу,
Мудом бебахт, жаҳон кўзга коронгу.

Неча йил гамга бўлдум мубталолиг,
Фароғу айшу роҳатдин жудолиг.

Чекиб ҳар турли ҳасрат эртаю кеч,
Маломатдин саломат бўлмадим ҳеч.

Менга хос эрди доим дарду гамлар,
Етиб даҳр ахлидин ранжу ситамлар.

Кима килсам зиёфат, яхши хизмат,
Чикиб кулбамдин эттилар надомат.

Ман айлардим хама мўминга ихлос,

Мани ўйнар эдилар ом ила хос.

Десам бошдин-аёғ киссам узунрок,
Ки шархи «Шахнома»дин фузунрок.

* * *

Мингда уч юзда йигирма саккиз ким сана,
Ўз-ўзидин бир жисим ёлбориб деди мана.

Хар қачон ахбоби хамсолинг била килсанг равиш —
Борхо ўз жинсинг истаб, суҳбат айла ёзу киш.

Шарти аъзам буки сендин бўлсин аъло бориси,
Бул сифат бўлса бўлурсан бахраманд тун-кун бaсе.

Гах килурлар дурфишонлиг тингласанг нафе етар,
Гах алар нукта сўруб, махзун дилинг хуррам етар.

Гах бўлур душвор ишларда алар мушкул кушод,
Юрсанг онлар бирла бўлгай фахму идрокинг зиёд.

Эй хабиблар, барф келди осмондин бизлара,
Хеч ишорат бўлмадиким дўстондин бизлара.

Бир-бировни барф бахонаси била ёд айлали,
Тез беринг бир ижтимоъ, гамгин кўнгул шод айлали.

Гарчи ахбоблар унутган бўлса ёд айлай дедук,
Хар бирингиз бирла чун ини биродардек эдук...

Хох нохох кургун ўлсун тез этинг, кеч колмасун,
Боримиздин дарду гам дафъ бўлсуну хеч колмасун...

Бўлгай эрди жумламизга гўйё курбон ийд,
Айби йўқдур уматан килгусидур хўжа, сайид.

Барчамиз бир-биримиздин мустахикмиз созга,
Ким етар, ким етмагай бу киш ўтуб ул ёзга.

Ёш йигитлик, жони согликда ганимат шодлиг,
Умр ўтиб борур хамаси бўлгуси барбодлиг.

Бу жахон дардисари йўкса туганмас кун-бакун,
Шох, гадода сад хазор армон била доғу тугун.

Дўст ишидур бир-биридин айтиб олмок ижтимоъ,
Бил, гаразгўйлар ишидур имтихон, кийна, низоъ.

Ижтимоъдин муддаомиз емагу ичмак эмас,
Барф бахона бу Факирни йўкса хеч ким йўкламас.

ТАГОЙ СЎФИ ХОРАЗМИЙ ХАКИДА ХАЖВ

Ёронлар, бовар этманг сўзласа, зинхор Тагой сўфи,
Жахонда йўк анингдек чобуки айёр, Тагой сўфи.

Бўлур хар кунда юз турлук, тушунмас холига хеч ким
Ки, килмас халклардин зарра номус-ор, Тагой сўфи.

Баногох кўрсангиз бошида салла, эгнида малла,
Бокарда алла-балла кўзлари хунхор, Тагой сўфи.

Гахи сўфи, гахи девона янглиг кийгуси жанда,
Гахи кўрсанг фурушанда кезар бозор, Тагой сўфи.

Гахи бошида таввоф, гах яланг бошга кияр такя,
Кияр гах телпаку сўфак кулох, дастор, Тагой сўфи.

Гахи олгай саройдин хар матои саллага лойик,
Суюниб бир неча кун бошига чулгор, Тагой сўфи.

Гахи воиз, гахи хофиз, гахи зохид, гахи косиб,
Гахи сог одамий, гах жиннига ўхшор, Тагой сўфи.

Кўрар кўзга хамиша аблах янглиг масти лояъкил,
Олиб сотмокда андок йўк фаранг, хушёр Тагой сўфи.

Дўконидин гахи турлук харид олиб кезар тун-кун,
Каён борса сотар бозору бебозор, Тагой сўфи.

Гахи оту эшак минмай, азондин кечгача кўнмай,
Давом дунё учун тинмай елиб юрор, Тагой сўфи.

Кеча-кундуз кезар тинмай пиёда калъа, ёбонлар,
Кадрдондирки, бўлса хар кима дучор, Тагой сўфи.

Кулох, жанда киуб сахролара чикса бори элни
Мурид эткай ўзига — эркаку ночор, Тагой сўфи.

Агарчи борса ёт ерлара хам хеч ранжимас харгиз,

Бўлур чок ўз уйидек кўрсангиз хар бор, Тагой сўфи.

Хар одамни билиб табъини сўзлар табъига лойик,
Замонасоз бўлуб хар турли халк йигнор, Тагой сўфи.

Качон кўрсанг «Каломуллох», «Далойил» ёнида хозир,
Кўруб ихлос килганларга ваъз айтар, Тагой сўфи.

Шахарда юрса хам «Куръон», «Далойил» ёнидин кўймас,
Баногох сураи «Каф»ни килур такрор, Тагой сўфи...

Ўкур беш вақт намозин тарк килмас синасанг ул дам,
Юмар огзи, кўзин махкам на дам урор, Тагой сўфи.

Имомга иктидо килгонларин кўрган кулар бешак,
Имом боргач рукуъ бу саждада ё.тор, Тагой сўфи.

На муллодур, на сўфидур, на коридур, на эшондур,
Бу боисдин чекар кўб охи оташбор, Тагой сўфи.

Бу кайгу хасрати дафъи учун тун-кун кезар тинмай,
Анинг-чун ижтимоъ деб борхо йўртор, Тахой сўфи.

Шахарда барча толиблар била доим бўлуб улфат,
Ўзи бекор, аларни хам килур бекор, Тагой сўфи.

Качонким, ижтимоъ борин бир ой аввал эшитса хам,
Етушгай барча одамдин бурун тайёр, Тагой сўфи.

Агар бир мажлис ичра бўлмаса, ким тутса отини,
Келур оллоху акбар деб, кирар тайёр, Тагой сўфи.

Агар хар ерда кургон мажлис ўлса, борсангиз ногах,
Ўшал мажлис юкорисига боксанг — бор Тагой сўфи...

Мажолис ичра ётса беш киши ўрнин олиб ётур,
Кўрунур барчага чун кабри бузруквор, Тагой сўфи.

Агар тафсирхонлиг бўлса хам ухлар, кулок солмас,
Магар чертилса ётмас танбуру дутор, Тагой сўфи.

Ва лекин ош пишган вақтда «Оллох» деб турар сакраб,
Хамага ваъз айтар, гар килмаса хам кор, Тагой сўфи.

Мудом жохил ўглонлар била бўлгуси хамсухбат,
Бари эшону охунддин базе безор, Тагой сўфи.

Агарчи топса махвашли зиёфат, кувсанг хам кетмас,
Неча дашном, хакорат кўрса миннатдор, Тагой сўфи.

Тутуб саколидин хар дам урарлар тарсаки бирлан,
Ризодур хар тарика берсангиз озор, Тагой сўфи.

Биров соз этса даф кокиб чикар вор тўнларин ешуб,
Туруб, отиб муаллак ракс уруб ўйнон, Тагой сўфи...

Билингким, борхо максад-муроди шул кеча-кундуз
Хамага айлагай бебоклигин изхор, Тагой сўфи.

Мабодо хушрў махваш топилса, оздуруб йўлдин
Бўлуб хамдам, неча эшонлара катнон, Тагой сўфи.

Анинг бирла кезар тинмай неча кун калъа, ёбонлар,
Анга бўлгай мулозим балки хизматкор, Тагой сўфи...

Агар чиндин эшонлар била ўлтурса хамхилват,
Кўрунса хўб йигитлар, кўзлари ёнон, Тагой сўфи.

Бу кунда ёш йигитларга килур чандон насихатлар,
Ўзидан колмаган дунёда ўглон, гор, Тагой сўфи.

Бу янглиг жохил ўлса хам чу топса олиму дарвеш,
Аларни хоки пойин кўзига суртор, Тагой сўфи.

Анга десанг: «Узунг сўфи бўлуб шарм айламасмусан?»
Килур рогиб, аларнинг сухбатин мактор, Тагой сўфи.

Агар ким бўлса-бўлсун, койил айлар ўз дегонига,
Ўзи гар кари бўлса хам ажаб маккор, Тагой сўфи...

Мусаллам химматига, журъатига, кувватига, лек —
Агарчи бўлса юз ботмон юк судрор, Тагой сўфи.

Қилай таъриф андок кўрмаганлар айласун тахсин,
Йўк андок одамизод ичра савлатдор, Тагой сўфи.

Юришда тевадек ер юзида йўк бормагон жойи,
Улуг, бўлмаса хам рўйи замин кидрор, Тагой сўфи.

Таажжуб, катта килмиш жуббасин хак-чун минорадек,
Юруса тебранур ер, кўрган от хуркор, Тагой сўфи.

Агарчи наъра урса жумла махлук захрасин ёргай,

Тева ёнидин ўтса, тева ҳам хуркор, Тагой сўфи...

Таом ер бўлса юходек тўярга акли етмайдур,
Ва лекин канча тўйса ҳам сахар бедор, Тагой сўфи...

Эмас бехислат, аммо «ху» деса аъзолари титрар,
Юроки ўтламай казон каби кайнор, Тагой сўфи.

Йигит айёмида умри ўтиб фиску фужур бирла,
Бас эмди тинмай айлар тавба-истигфор, Тагой сўфи.

Неча йиллар сипошилик килиб сўнгра бўлур сўфи,
Этиб бу дуняда хар турли касбу кор, Тагой сўфи.

Буни фахм айлангизким, килмагандур бадасилликдин
Ки, инсон хайлига килмай тарикча кор, Тагой сўфи.

Шахарда хар кишиким орзу килса сафар килмок,
Бу ишин ташлабон бўлгай анга сардор, Тагой сўфи...

Чика билса шахардин масту бепарво кезар тун-кун,
Демас ахбобига кўнглидаги асрор, Тагой сўфи.

Замонасозлигда боз йўк андок жахон ичра,
Деса хак сўзни ҳам кайтарсангиз, кайтор, Тагой сўфи.

Чу андин хар киши бир мушкил иш килса савол, ул дам,
Килур осон иложин демагай душвор, Тагой сўфи...

Изо берсанг неча маърака-мажлис ичра, ул кулгай,
На айбин юзига айтсанг ўзи икрор, Тагой сўфи.

Вале андог жахонда бевафою бемурувват йўк,
Гани вақтингда бўлгай барчадин гамхор, Тагой сўфи.

Равиши кам деса анга шадид келгуси вақт-бевақт,
Сахарда ё ярим окшом эшик кокор, Тагой сўфи.

Маломат этканинг билмас агар дашном килсанг ҳам,
Чибиндек айланиб келгай яна беор, Тагой сўфи.

Шахарда маърака-мажлисга борсадайгуси емок,
Вале сахрода эшонларга сохибкор, Тагой сўфи.

Мусофирман, бўлур жойим йўк асло деб килур даъво,
Дўконин кўрсангиз хар бойдин молдор, Тагой сўфи.

Хамадин кўб маишатлар килур дунёда армонсиз,
Яна «Армонли кетдим, дод!» деб какшор, Тагой сўфи.

Жахонда килмаган кайфи йўк, аммо эмди кайф этмай,
На чой, томоку банг тарёкию кўкнор, Тагой сўфи.

Каро нос кайф этар хар дамда ўн мисколгина, лекин,
Иссиг ош ичса борисин килур мурдор, Тагой сўфи.

Саколи окариб килмас савоб ила гунах фаркин,
Ўзини балки эшондин баланд санор, Тагой сўфи.

Бўлур дилтанг гахи мулло, корию жумла эшондин,
Килур дашном кўкраб масти мажнунвор, Тагой сўфи.

Кими хону тўра, козию муфти жумла эшондин,
Шикоят килса гар бошдин-аёг титрор, Тагой сўфи.

Гахи ихлос бирлан чорлаб онларга килур хизмат,
Таому мева хар навъ килур саршор, Тагой сўфи.

Борур ихлос ила аксар улуг олимлар олдига,
Анинг тобгунча хар айбини хўб синор, Тагой сўфи.

Хамага сўз топар, йўк ўзидек танти бу оламда,
Ва лекин нобакорлар бирла чун кондор, Тагой сўфи.

Тополмай пири комил боамал олим мувофик табъ,
Куюб доим ўзидек ахли дард излар, Тагой сўфи.

Неча йил олам ичра турлук эшонга килиб хизмат,
Бўлубдур охир эмди умрида аттор, Тагой сўфи.

На килсун умрида бир кўргани етмиш яшар кампир,
Чу кўргач бир-бирини ер уруб каргор, Тагой сўфи...

Бу ният бирла тинмай борхо пул танга жамъ айлар,
Бу боисдин азиз жонини кўб кийнор, Тагой сўфи,

Эди аввал паришонхол бирла дарбадарликда,
Хамадин эмди бўлмиш кавмида пулдор, Тагой сўфи.

Жахонгашта эди аввал, хамеша ломакон эрди,
Бўлур жарчи янги калъада хам жойдор, Тагой сўфи...

Илохо, бу Факирингни дуосин мустажоб айлаб,

Хама мўминга бер фарзанд чу хайри кор, Тагой сўфи.

ГАЗАЛЛАР

* * *

Найлайн дилдордин бегона бўлдим окибат,
Юз гаму хасрат била хамхона бўлдим окибат,

Бу жудолик хасратидин хеч чидолмай дахр аро,
Хонумонимдин кечиб девона бўлдим окибат.

Неча кун куйида юрдим, етмадим васлига хеч,
Кеча-кундуз йигладим, гирёна бўлдим окибат.

Ёрни васлига еткайманму деб шому сахар,
Ўртаниб хажр ўтига парвона бўлдим окибат.

Хаддин ошди бу мани расволигим олам аро,
Халки олам ичра кўп афсона бўлдим окибат.

Хам яна бору йўкимни йўлида барбод этиб,
Молу жондин айрилиб, вайрона бўлдим окибат.

Вирд этиб исми шарифингни хаёлим олдириб,
Кадди-бўйинг фикридин мастона бўлдим окибат.

Равшан этмиш тийра кулбамни жамоли шамъии,
Ўз маконим ўзима, гамхона бўлдим окибат.

Кўп бу олам ичра мандек ошику вобасталар,
Лек алар бир ёна, мен бир ёна бўлдим окибат.

Етмишам эмди халокатга не айлай мен Факир,
Мархами дил топмадим, хайрона бўлдим окибат.

* * *

Ишни битирмай, эй иним, айшу ишратлар абас,
Одатинг махмиллиг эрса, бу маишатлар абас.

Топмайин максад бу корингдин на лозим шодлир,
Бу замонда ҳақдин ўзга дўсту улфатлар абас.

Эътикодим эрди кун-кундин зиёдаким сенга,

Ўкимокга рогиб эрдинг, ўзга ниятлар абас.

Лекин эмди масту бепарволигинг кўйгил яна,
Йўкса бу савлату сийрат, хўб суратлар абас.

Етса молим, етмаса жоним, деган олим бўлур,
Бехуда нокаслара йўкса бу химматлар абас.

Кудратинг етганча хак деб, туш илм кўйигаким,
Саъй килдинг неча кун то бўлди меҳнатлар абас...

Юрмагил бедардлар бирла бас эмди ор кил,
Катта бўлгандин сўнг этган жумла гайратлар абас.

Гила килма бу Факир ўртанганидин килди назм,
Бизга йўкса бу фазойил ушбу шухратлар абас.

* *

Хакикат дўст шулдур бўлса дўсти жонига мухтож,
Чин ошик улки тун-кун бўлса ўз жононига мухтож.

Эмас ул ошик хар махвашни кўргач кўнглин олдурса,
Хар ошуфта бўлур ўз дардининг дармонига мухтож.

Ким окил эрса бир ёр ила умрин ўткарур доим,
У нодондур жахонни хар лаби хандонига мухтож.

Неча бир соддалар хар нозанин ишкида овора,
Берурлар дил аларнинг ваъдаи ёлгонига мухтож.

На армондир кишининг бир вафолиг дилбари бўлса,
Хамиша бўлсалар бир-бирининг фармонига мухтож.

Манам чин эътикодим сизга холис дўсти жондурман,
Хар одамким бўлур ўз кўнглин олдургонига мухтож.

Эрур нокаслик ул аввалги дўстидин жудо бўлмок,
Бўлурлар баъзи тоза хамнишин бўлгонига мухтож.

Дуогўйинг, Факиринг жонидин ортукчасидурсан,
Етушсанг кулбасига сен киби пурдонига мухтож.

* * *

Юртимизда ибтидои рағбати жон бўлди печ,

Сўнгра кам-кам, йил-байил машхури даврон бўлди печ

Косиб ахли доги килдилар бино юз шавк ила,
Баъд аз он шухрат топибон, калъа ёбон бўлди печ.

Бул ажойиб мадраса печи бино килдурсаким,
Айш учун онларда хам беҳад намоён бўлди печ.

Шахр халки хар йил айларлар иморатлар базе,
Бир-бирисидин кўруб кўнглида армон бўлди печ.

Аксари эл тоза жойин йўкдурурлар печ учун,
Биткариб олгонлари чун боги бўстон бўлди печ.

Дашк ила кўп нотавонлар қарз этиб айлар бино,
Лек сипохию тавонгарларга арзон бўлди печ.

Косибу мулло, авом, факру гино, шоху гадо,
Хохики кофир, жухуд, жумли мусулмон бўлди печ.

Бил махол эрди қадимгиларга лой тандирча хам,
Эмди чу мард аксари инсонга осон бўлди печ.

Бу сифат таърифа лойиқдурки роғибдур хама,
Айшу ишрат истаганча рохати жон бўлди печ.

Эътироз этган киши қамдур жахон айвонида,
Бул хусусан қарилар дардига дармон бўлди печ.

Етса қудрат қошки қилсанг бино зийнат била,
Нозу неъмат бешумор бўлса, ободон бўлди печ.

Қелса бетаклиф махбубул қулублар субху шом,
Бўлса бу янглиг ҳамиша чун гулистон бўлди печ.

Нозанинлар гул юзидин етса равшанлиг анга,
Бас не армон, йўкса базм ақлига зиндон бўлди печ.

Мунча тавсиф этдинг аммо йўк ўзингда, эй Факир,
Қил бино бирин сенам, беҳадду поён бўлди печ.

* * *

Олам ичра топмадим бир дўсти жонон бегараз,
Олиҳиммат деганим сўнг бўлди ёлгон, бегараз.

Бу замонда кадру киммат билгудек дўст колмади,
Беҳуда бермаслар ўз хешига ҳам нон, бегараз.

Дўст бўлган дунёдин кўл ювса бир-бири учун,
Дунмайин бир-бирига килса фидо жон бегараз...

Лойики иззат бўлурсан бу сифат тутсанг равиш,
Лек борсанг хар макон неъмат фаровон бегараз.

Рохи рост деб дасти холий борсангиз эшонлара,
Равнакинг йўк ҳеч хабарин олмас эшон бегараз.

Хурмат этмаслар авом ичра улуг олим эсанг,
Эл азизиким кўп айлар хайру эхсон, бегараз.

Юртимиз халки, маховоти, тавозе, таъзими,
Зинхор алданма килмас кўрса хандон бегараз...

Меҳрибондур бир-бирин кўргач килурлар эхтиром,
Махз тил учи килурлар гила бўхтон бегараз.

Холисаллилох бир дўстим борай деб ижтимоъ,
Хох-нохох айлаб эрди аҳду паймон бегараз.

Заррадек кавлу-карорин эътибори йўк экан,
Завк-шавк ила чакирмай аксар инсон бегараз.

Ваъдасин чин билма, хар ким ваъда берса, эй кўнгул,
Ваъдага килмас вафо хар бир мусулмон бегараз.

Мен Факир холис хабибим борки дўсти ду жахон,
Мухлисиман меҳрибон Абдулрахимжон бегараз.

* * *

Дўстлар, даҳр ичра баъзи ошноларни кўрунг,
Баъзи юз куй, шумфикр, рўйи сиёларни кўрунг.

Кўрса кимдин фойда таърифини айлар олдида,
Бу тамаъчин зоҳиду баҳти кароларни кўрунг.

Кўрмаса нафъин хамиша тахт этар бошдин-аёк,
Аямас устоз, отосин, беҳаёларни кўрунг.

Дўст бўлса хар кишига бўлмас асло бегараз,
Бу гаразгўй турба, хуржунсиз гадоларни кўрунг...

Баъзи мажлисда такаллум килса навбат бермагай,
Жахли бадраг, мода чу хирс кадхудоларни кўрунг.

Ўзида ботмон айб дегай биров мисколини,
Тажриба айлаб бу навъ кибру хаволарни кўрунг.

Эй Факирий, бу авом адно учун ўртанма ҳеч,
Йил-байил бундин баттаррок можароларни кўрунг.

* * *

Булбули зорам кўнарга бир гулистон истарам,
Бу гўзалларни не айлай кўйи бўстон истарам.

Ошикам, эй дўстлар, жонимга жонон топмайин,
Жонажон бўлголи бул жонимга жонон истарам.

Ёрсиз жаннатга кирсам зулмату зиндон эрур,
Нола, афгон тортибон бир мохитобон истарам.

Ёрсиз ёйдек бўлиб колдим ажаб бемормен,
Писта лаълидин анинг дардимга дармон истарам.

Юз ўгурдим бевафолардин баса безорман,
Бовафоу бомуравват чашми мастон истарам.

Беҳаё, бешарм махваш кўп, кўнгул севмас ани,
Тозаю тар гулбадан зулфи паришон истарам.

Гар топилса бир мувофиктабъ дилбар, дўстлар,
Ман Факир тун-кун ани бўлмокга мехмон истарам.

* * *

Бу янглиг кўп сиза ихлосим, аммо бериё бўлгай,
Бу жоним кошки сиздек хабибимга фидо бўлгай.

Ки содадил бўлиб хар кимки борса хизмат айларсиз,
Не бўлса муддаонгиз икки оламда раво бўлгай.

Жахонда якка бизлар эрмас хар ким кўрсалар сизнн,
Билиб бу феълингизни айрилишмас, ошно бўлгай.

Ўгурса сиздин хар ким юз, эрур ул ахмаку аблах,
Ўзини кадрини билмас анингдек бевафо бўлгай,

Бўлур одам била одамда фарк бир бўлса хам асли,
Бахилу беҳаё баъзиси, баъзи кадхудо бўлгай.

Бўлур баъзи вафолиг, баъзи фитна хамчу шайтондек,
Бу боисдин нечаси дўсти жонидин жудо бўлгай.

Манам оламда кўп одам била бўлдимки хамсухбат,
Жахонда кўрмадим сиздек чучуктил камнамо бўлгай.

Ким излаб борса меҳмон бўлгали ёту кариндошдин,
Анинг ҳақкида тун-кун хизматингиз жо-бажо бўлгай.

Ва лекин сиз хамага холисаллилох килиб хизмат,
Яна хам хуш сўзингиз ахли дардларга даво бўлгай.

Бу ихлос бирла хизмат қилганингиз кўрса хар бир иард,
Бўлур банда эшикингида ўлгунча гадо бўлгай,

Хусусан ховлингизга бўлса меҳмон толиби илмлар,
Аларга иззатингиз, хизматингиз бебаҳо бўлгай.

Факир айлар дуонгиз холисаллилох кеча-кундуз,
Бериб бисёр фарзанд ёрингиз доим худо бўлгай.

МУСТАЗОД

* * *

Эй дил, бу жахон хўблари қилди сани зор,
Дийдорига шайдо,
Хам холи паришон.
Бўлдинг неча гулчехра жамолига гирифтор,
Ноланг килиб ифшо,
Хам айладинг афгон.
Васли талабида югуриб кечаю кундуз,
Йўк эрди кароринг
Вобасталигингдин.
Онлар сани ҳақкинда мудом эрди жафокор,
Раҳм этмайин асло,
Зулм айлади чандон.
Бу куй аро кўрдинг неча навъ ранжу аламлар,
Тарк айламадинг ҳеч,
Мажруҳ бўлиб хам.
Хижрони ўқи қилди юрак-багрингни афгор,
Чекдинг неча танхо,

Ишки аро нолон.
Кўксингга пичок урсанг аларнинг назарида,
Истаб кулай рах,
Ўлсанг агар ул дам.
Бу холингга кайгурмас ўшул кофири хунхор,
Бал анга тамошо,
Айлар лаби хандон.
Бир зарра гила килма алар кори жафодур,
Ошикларига,
Йўк расми вафоси,
Лекин тил учи меҳрига алданмаки зинхор,
Килса неча игво,
Сўзи бари ёлгон.
Сандин бурун ўтмиш неча бир ошику маъшук,
Бу дахр аро гирён,
Бори хама дил соф.
Ранжур булуб фуркати ичра чекиб озор,
Хам ёқди саропо,
Бу оташи хижрон...

МУХАММАСЛАР

Дўстлар дахр ахли жононига ёр ўлмок галат,
Бодаи васлин тилаб тун-кун хумор ўлмок галат,
Халк таъни бирла элга ошкор ўлмок галат,
Бевафо маъшукалар куйида зор ўлмок галат,
Истабон васлини кўздин ашкбор ўлмок галат.

Кўп бу дахр ичра паривашлар ду чашми олалар,
Ошик ўлгай кўрсаким кўздин тўкибон жолалар,
Балки ёш ўрнига сўнгра кон тўкар чун лолалар,
Фуркат ичра тинмайин айлаб фиғону нолалар,
Тиги хажридин бу янглиг дилфигор ўлмок галат.

Дил берурлар кўргачин меҳри жамолин истабон,
Кошки келса экан шўридахолин истабон,
Бўлма харгиз хомтамаъ оби зилолин истабон,
Хажр водийси аро ул ой висолин истабон,
Беадад ранжу аламларга дучор ўлмок галат.

Бокма ихлос ила кўпдур хусни гул, коши каро,
Чунки нодонлик эмасму кўргач ўлмок мубтало,
Баъдазон сен ўз юрак-багринг килиб кону яро,
Жустужў айлаб фирокида туну кун дахр аро,
Топмайин васлин анинг беътибор ўлмок галат.

Ушбу хасратлар била тинмай мудомо кон ютуб,
Чин хакикат ошнолардин кўнгулни совутуб,
Бу тараддуд бирла етмас тийра кулбанг ёрутуб,
Пуржафо дилдордин хар дам вафони кўз тутуб,
Жон фидо айлаб йўлида хоксор ўлмок галат.

Шод бўлгунг кўргачин кўрдимки, дилдорим дебон,
Сўрди ахволим билиб бу ногахон зорим дебон,
Ваъда килди келмагига бу кеча ёрим дебон,
Садка энди йўлида харна йўку борим дебон,
Кўз тикибон йўли узра интизор ўлмок галат.

Бил бу савдолар била олам аро машхур ўлуб,
Кун-бакундин хам Факиру бенавою хор ўлуб,
Дўст ушбу эркан аммо, юрса андин дур ўлуб,
Чэкаро, берахм махваш хуснига магрур ўлуб,
Фуркати дашти аро мажнуншиор ўлмок галат.

* * *

Дўстлар, бир мосиво бўлган гарибмен, найлайн,
Ўртаниб, ёниб адо бўлган гарибмен, найлайн,
Юз аламга ошно бўлган гарибмен, найлайн,
Бекасу бемуттако бўлган гарибмен, найлайн,
Мискину бедасту по бўлган гарибмен, найлайн.

Телмуруб колдим нетай модар, падардин айрилиб,
Йўл адошиб гамда колдим рохбардин айрилиб,
Кеттилар дўсту ёронлар хам назардин айрилиб,
Лек мен колдим бу ерда яхшилардин айрилиб,
Дарду гамга ошно бўлган гарибмен, найлайн.

Ўтди ахволим хазинлиг бирла кун-кундин батар,
Гамни сахросида колдим бўлмишам бир муштипар,
Қўрсалар бедардлар холим кўриб айлар хазар,
Йиглаюрман холима хардам куяр жону жигар,
Минг алам бирла адо бўлган гарибмен, найлайн.

Зор кўнглумни менинг кўп зор бўлганлар билур,
Дард кўрганлар билур, бемор бўлганлар билур,
Тиги гам бирла дили афгор бўлганлар билур,
Чун азиз боши жахонда хор бўлганлар билар,
Бекадр, берахнамо бўлган гарибмен, найлайн.

Мисли какнусдек бу оташ ошиёним куйдурур,
Оху ноламини ўти бешак забоним куйдурур,

Хам ёкиб жисмим, юроким, устухоним куйдирур,
Балки жоним кул килиб, рухи равоним куйдурур,
Бас куюб хам кам бахо бўлган гарибмен, найлайн.

Хеч мусулмон мен каби кўнгли паришон бўлмагай
Етмайин максудига багри тўла кон бўлмагай,
Эл аро ифшо бўлуб хайрону нолон бўлмагай,
Телбалардек кеча-кундуз дийдагирён бўлмагай,
Аклу хушидин жудо бўлган гарибмен, найлайн.

Сирри пинхоним десам бир ёри жоним йўк менинг,
Дегали, холинг нечукдур, меҳрибоним йўк менинг,
Найлайн девонадек далли маконим йўк менинг,
Чун куши беболу пармен, ошиёним йўк менинг,
Нотавон каддим дуто бўлган гарибмен, найлайн...

* * *

Сана эрди минг уч юз бир кам ўттуз, бўлди уй бесар,
Яди зай ахчадин ўн бизлара мотам бўлиб рохбар,
Жахондин ўтди модар, бўлди сўнг ичган-еганим захр,
Хама кон йиглашиб колдук юраклар пора, кўзлар тар,
Экан пушту панохим, обрўйим, дўстим, модар
Хаётин катта давлат билмак эркан хар кима бехтар.

Халойик юрт-баюрт ўйнаб-кулуб килди ийду байрам,
Ажаб, бехад шукур, хак бизлара кўрди раво мотам,
Дебон катта-кичик вой устига вой, ох уруб хар дам,
Инончим хам суянчим килди рехлат, бўлди каддим хам,
Экан пушту панохим, обрўйим, дўстим, модар.
Хаётин катта давлат билмак эркан хар кима бехтар.

Хаётида уйимиз гўйё бозор эди тун-кун,
Эру хотин хама бир-бирга беозор эди тун-кун,
Боримизга бўлуб шод меҳрибон хушёр эди тун-кун,
Хусусан мен гарибидинки миннатдор эди тун-кун,
Экан пушту панохим, обрўйим, дўстим, модар.
Хаётин катта давлат билмак эркан хар кима бехтар.

Мудомо хуш сўзи ила барчамиз шодоб этар эрди,
Бериб панду насихат чун зари ноёб этар эрди,
Каюмиз кўрса, сиз биз деб баса одоб этар эрди,
Боримизга кеча посбон ўлуб, кам хоб этар эрди,
Экан пушту панохим, обрўйим, дўстим, модар
Хаётин катта давлат билмак эркан хар кима бехтар.

Етишса дахри дундин гам, дилим айлар эди хуррам,
Туфайлидин кишу ёз, кеча кундуз шод эдим бегам,
Нетай онсиз коронгу кўринур чун кўзима олам,
Чошиб аклу хушим девона янглиг бўлмишам кам-кам,
Экан пушту панохим, обрўйим, дўстим, модар
Хаётин катта давлат билмак эркан хар кима бехтар.

Эди шодимга шод, гах етса гам мендин батар гамгин,
Бериб ширин забонлиг бирла дил-кўнглум килиб таскин,
Дер эрдим сирри пинхоним кимим бор эмди бир ичкин,
Колиб мен бош очик гам-гуссада бўлдим ажаб мискин,
Экан пушту панохим, обрўйим, дўстим, модар
Хаётин катта давлат билмак эркан хар кима бехтар.